

Žemaitėskas šv. Mėšės, Žemaitiu Kalvarėjės kalnā Vėlniaus bažnīčiuos

ŽEMAITĪTĖ Jurga

Vėlniaus žemaitė jau aple do dešimtmetius kuožnās metās par Vėsus Švėntus sosėrenk vėnuo eš Vėlniaus bažnīčiu ē par švėntas Mėšės, katruos ī aukuojemas žemaitėškā, meldas ož mėrosius savo artėmušius ē Vėlniaus žemaitius. Pėrmuosės tuokės šv. Mėšės bova pradietas organizoutė Bernardinu bažnīčiuo. Inicetīva tam paruodė Vėlniaus žemaitiu kultūras draugėjė (tuoliau – VŽKD), katrā daug metu vaduovava Dirgielienė Dalė, ē Vėlniou gīvenė eš Žemaitėjės kėlė vėnuolė prancėškuonā. Vėnuolė tas šv. Mėšės žemaitiu kalbo ē liuob aukuotė. Gėiduorius, tonkė ē vėsa žemaitiu kuora liuob soorganizoutė pedaguogs, kompuozituorios ē mozėkonts, aktīvos VŽKD narīs Petruošios Anicets. Daug kartu žemaitėskas šv. Mėšės ī vīkosės ē Vėlniaus Šv. Juokūba, Vėsū Švėntū bažnīčiuos, vuo paskotėnēs metās anuos dėdėli būri suostėnēs žemaitiu ē anū prieteliu sotrauk i Vėlniaus Žvierīna Švč. Mergelės Marijės Nakaltuojė Prasėdiejėma bažnīcė. Anuos klėbuons ī eš Plungės krašta kėlės aktīvos VŽKD narīs Rapalis Vītauts. Priš kelis metus ons žemaitius i žemaitėskas šv. Mėšės pakvėitė ē par šv. Velīkas. Pernā tuokės Mėšės čė bova aukuojemas tretiuojė šv. Velīku dėina– balondė 11. Tumet šv. Mėšiū Lėtorgėjuo gėiduojė ē pu šv. Mėšiū bažnīčiuo koncertava kompuozituoriaus, pedaguoga, dirėgėnta, dainininka, rėngėniū organizatuoriaus Žilė Aloīza vaduovaujems Kretinguos kultūras cėntra mėšrus ansamblis „Svaja“ ēr vuokalinis duets (dainininkā Duomarkātė-Budrienė Nomeda ēr Žilīs Aloīzos). Skombiejė A. Žilė sokortas dainas ēr gėismės pagal ivairiū autuoriu tekstus. Šv. Mėšiuos dalīvava, sosėrinkusius so švėntuom Velīkuom pasveikėna bovusi VŽKD pirmininkė Dirgielienė Dalė, Lietovuos Respublikas Seima parlamėntėnės Žemaitiu gropės narė Šalašėvičiūtė Rimantė ēr Vinkos Antans.



No vuo šiū metu kuova 2 dėina Vėlniaus Žvierīna Švč. Mergelės Marijės Nakaltuojė Prasėdiejėma bažnīcė pu sava stuogo prėglaudė ē Vėlniaus muokītuojū nomū liaudėskas mozėkas ansambli „Konklelė“ (liet. *Kankleliai*), katram vaduovaun eš Kretinguos kėlosi Lietovuos liaudėskas mozėkas puoselietuojė, liaudės mena kolektīvu organizatuorė, kanklininkė-atlėkiejė, pedaguogė, folkloristė Čičinskienė (Kobėliūtė) Daiva Bernodeta. Tou šeštadėini, pu šv. Mėšiū, ansamblis „Konklelė“ karto so Vėlniaus muokītuojū nomū folkluora ansablė „Tīklė“ (vaduovė Brazaitienė Vėtalėjė) dainininkās ē kėtās suostėnēs žemaitės aple dvė so posė valonduos gėiduojė Žemaitiu Kalvarėjės Kalnus.

Sungailienės Loretas portėgrapėjuos – Vėlniaus muokītuojū nomū liaudėskas mozėkas ansamblis „Konklelė“ ē anuo prietelė gėid Žemaitiu Kalvarėjės Kalnus. Vėlniaus Žvierīna Švč. Mergelės Marijės Nakaltuojė Prasėdiejėma bažnīčiuo. 2024 m. kuova 2 d.